


# JISHINDA JA KUYA KWI LESA





© 2013 W.M.Press, Inc. Kipikichala kya peulu kyalengwa naba Edwin B. Wallace. Ba Meryl Esenwein balenga bino bipichala, kiji peulu pamo ne biji pa mapeji 10, 12, 14, 16, 27, 29, 39, 41, 42, 44, 46, 47, ne 48.

# **LESA WALENGELE NTANDA YETU NE 1**

## **BINTU BYUMI BYONSE**

**“Mu ntendekelo Lesa walengele bya mwiulu ne ntanda.”** –Ntendekelo 1:1

**“Mambo mwi aye mo mwalengelwe byonse, ne bya mwiulu ne bya panopantanda . . . .”** –Kolose 1:16

**“Anweba mwaubilwa bibusa kwi Yehoba, yenka walengelé mwiulu ne ntanda. Mwiulu mo mwiulu mwa Yehoba, pakuba panopantanda wipapaine ku bantu.”** –Masalamo 115:15, 16

Ntanda yajinga yalumbuluka byo eipaine ku muntu. Tangai kano ka buku mukumona byamwekele.



Ponkapo Lesa waambile'mba: "Tulenge bantu mu kipa-sha kyetu, betupashe; bekale na bunkambo [bukalama] ... bwa pano pa ntanda ponsetu ...." —Ntendekelo 1:26

# MUNTU WAALUKILE KE MUMI

3

**“Kepo Yehoba Lesa abumbile muntu na lukungu lwa panshi, kabiji wapuyile ne muya wa bumi mu myona yanji, byo-nkabyo ne muntu waalukile ke mumi [bumi]\*.”**

–Ntendekelo 2:7

**“Ponkapo Yehoba Lesa waambile’mba: ‘Kechi kyawama muntu kwikala bunke ne; nkamulengela nkwasho....’ Kepo Yehoba Lesa amulengejile muntu kulala tulo tuka-tampe, kabiji byo alajile, wamwangachile ne lubavu umo ne kunungakanyapo jibiji apa ponka pajinga lubavu. Kabiji yenkawa lubavu ye aangachile Yehoba Lesa mu muntu ye ye aalwile ke mwanamukazhi, ne kumuleta wamuletele kwi aye muntu”.**

–Ntendekelo 2:18, 21-22

\*Kwikala na bumi kyalumbulula’mba tukekala kuntu kumo myaka ne myaka.

## 4 ADAMA NE EVWA BALENGULULA LESA



Kechi twafwainwa kuteleka ku jiwi ja Satana ne.

**“Kabiji Yehoba Lesa wamutwajile muntu ne kumubika 5 mu bujimi bwa Edena amba engilenga monka ne kwibulama. Kabiji Yehoba Lesa wakambizhe muntu amba: ‘Kubichi byonse bya mu bujimi wakonsha kujakotu monka mo usakila; kana ku kichi kya kuyuka byawamá ne byatamá kechi ukajako ne; mambo mu juba jo ukajako ukafwa kine.’”**

–Ntendekelo 2:15-17

**AYE MULOLO, JIKWABO DIABOLA NANGWA'MBA SATANA, WAZHINAUKILE LŪSA LWA LESA NE KUBEPA BUBELA.**

**“Pakuba mulolo wamwambijile mwanamukazhi amba: ‘Ine, kechi mukafwa ne’ Ponkapo mwanamukazhi byo amwene'mba kyo kichi kyawama kujako, kabiji kyamweka bingi bulongo ku meso, kabiji kyo kichi kyafwainwa kusaka mu kumwalula muntu ke wa mana, waapileko...ne kuja wajile. Kabiji wamupelepo mwata wanji ne aye wajile.”**

–Ntendekelo 3:4, 6

## 6 ADAMA NE EVWA KECHI BAKONSHE SHE KWIKALA MU BUJIMI NE



“...Yehoba Lesa wamufumishe mu bujimi bwa Edena amba akajimenga mushiji yenka ye bamufumisheko.... kabiji wabikile bakelubi.... ne mpoko itéma mujilo... mu kulama jishinda jiyá ku kichi kya bumi.” —Ntendekelo 3:23, 24



# JAJINGA JUBA JA BULANDA KU MUTUNDU WA 7 MUNTU BYO BALENGELE MAMBO BA ADAMA NE EVWA



“... Bundengamambo bwatwelele panopantanda ku muntu umo, ne lufu nalo lwatwelele na bundengamambo, ... kabiji byonkabyo ne lufu lwakumbene ku bantu bonse....”

—Loma 5:12

**Kintu kyakuvuluka**

**Muntu yense wasemwa na bundengamambo kabiji juba jimo ukafwa mambo lufu lwaishile na bundengamambo.**  
(Tangai Loma 5:12 jikwabo.)

# 8 KUFUKULA KWA LESA MU KWITUPULUSHA KU BUNDENGAMAMBO KO KWAKUTUMA MWANANJI UMO YENKA



**“Kabiji aye ukasema mwana wa mulume; ne obewa ukamutumba jizhina janji amba YESU; mambo aye yenka uke-bapulusha bantu banji ku mambo abo.”**

**–Mateo 1:21**

Pakutwela mu mutundu wa bumuntu, Mwana Lesa waishile nobe mu mubiji wa mwana mucheche.

**“Mambo mwi aye [Kilishitu Yesu], mo mwaikala kuyula konse kwa buLesu monka mu mubiji.”**

**–Kolose 2:9**

**“Mu ntendekelo mwajinga ao Mambo, ne ao Mambo ajinga na Lesa, ne ao Mambo ajinga Lesa. Kabiji ao Mambo aalukile ke muntu, ne kwikala waikajilenga muno mwetu . . . .”**

—Yoano 1:1, 14

**“Kabiji bino byonse byamwekele’mba, kifike . . . ‘Talai! muzhike wa kishinka wabulá kusambakanapo na mwana-mulume ukemita jimi, ukasema mwana wa mulume, Kabiji bakamutumba jizhina janji amba Emanuele (pa kulumbulu-la, ko kuba’mba, Lesa tuji nanji).’ ”**

—Mateo 1:22, 23

**“Mambo kwitusemenwa mwana, twapewa mwana wa mulume; kabiji bundamakyalo bukekala pe aye, ne jizhina janji bejitela’mba: Upána mana Wa kukumya, Lesa wa bulume bonse, Shabantu wa myaka, Mfumu wa mutende.”**

—Isaya 9:6

# 10 YESU KILISHITU — MULAMBO WETU WALUMBULUKA

“... Wabujilé kuyuka bundengamambo ....” –2 Kolinda 5:21



“Ye wabujile kulenga mambo ....”  
–1 Petelo 2:22

Kafwako mulambo ye akonsheshe ku-  
pana muntu wajinga WALUMBULUKA mu  
kufumya bundengamambo ne.

“Mambo kechi kyakonsheka'mba,  
mashi a bañombe balume ne a bam-  
buzhi afumye mambo ne.”  
–Bahebelu 10:4

Yesu ye Mukoko wa Lesa. “Talai, ye Mwana mukoko wa Lesa,  
ye ufumya bundengamambo bwa ba panopantanda!”  
–Yoano 1:29b

## **YESU WAPAINA MWEO WANJI MU KWITUPULUSHA 11**

Yesu wapopelwe pa musalabu wa kichi mambo bantu bashinta bamushikilwe. Bino lufu lwanji lwajinga kufukula kwa Lesa. Yesu, na mambo a kusaka kwanji mwine watayile mweo wanji mukupulusha obewa ne amiwa ku mambo etu.

Yesu waambile'mba, **“Ka paji uñangataye [Mweo wami] ne, pakuba namwela ami mwine. Nji ne lūsa lwa kumwela, kabiji nji ne lūsa lwa kumutambula jibiji . . . .”** —Yoano 10:18

### **TWAKULWA NA MASHI A MWANA MUKOKO WA LESA**

**“...Mwakujilwe [mwapotelwe]...kechi na bintu bibóla pamo ne siliva ne ngolode ne, poso na mashi anemá, nobe a mwana mukoko wabulá bulema nangwa kiko kicheche ne, o mashi a Kilishitu.”** —1 Petelo 1:18,19

### **KAFWAKO BITAPISHO BIKWABO BYAKONSHA KUFUMYA MAMBO NE**

**“...Mu kyonkakya kyaswa muchima wanji mo twazhijikilwa [kupatulwa] ponka pa kulambulwa kwa mubiji wa Yesu Kilishitu jimo jonka kikupu.”** —Bahebelu 10:10

**12 ... Byo twabingishiwa [babajilwa ku bololoke] na mashi anji, kine kabiji tukapulukila mwi aye ku bukaji bwa Lesa.”**


—Loma 5:9

“Nkambo, mukamvuluke byo mukeya mu bufumu bwenu.”



Uno kapondo kechi waitabijile mwi Yesu kabiji wapulukile.

“... Kine ne-mwambila namba, Jonka jino ja lelo, musakwikala ne amiwa mu Paladisa.”  
—Luka 23:43



Uno kapondo kechi waitabijile mwi Yesu ne, nanchi kechi wapulukile ne.

**“... Byo twakijinga bandengamambo [bakubula kukokela Lesa], Kilishitu witufwijile.**

—Loma 5:8

**BONSE BAITABILA MWI MWANA LESA 13**  
**BAJI NA BUMI**

**“Mambo Lesa byo ebatemwisha ba panopantanda,  
wapaine Mwananji yenkawa umo amba,  
bonse bamwitabilá kechi bonaike ne, poso  
amba bekale na bumi bwa myaka.”**

—Yoano 3:16

**“Ye witupokolwele mu lūsa lwa mfishi, ne kwituntutul-  
wila [kwituvilwila] mu bufumu bwa Mwananji ye atemwi-  
sha; mwi aye mo mo twamwena bukuzhi\* bwetu, lo lu-  
lekelo lwa mambo etu.”**

—Kolose 1:13, 14

\*Bukuzhi bulumbulula'mba twapotwa jibiji.



**“Kumvwa malaika wiba-  
mbile banabakazhi amba,  
‘Kange mube moyo ne;  
mambo nayuka namba,  
mumukeba Yesu, ye bapo-  
pele pa musalabu. Ka aji  
muno ne; mambo wasa-  
nguka, monka mo aambile.  
lyai, mumone po alajilenga  
Nkambo.’ ”**

**—Mateo 28:5, 6**



# YESU WAFUMINE KU BAFWA

15

“Ne wa bumi: bino nafwile, kabiji tala, ne mumi wa myaka ne myaka, kabiji nji na bakii ba lufu ne ba Kalunga [kisha kya mujilo].”

—Lumwekesho 1:18

“...Byo naikala na bumi amiwa, ne anweba nenuwa mukekalan-ga nabo.”

—Yoano 14:19

Mambo Kilishitu washinda lufu kabiji uji na bakii ba lufu, pano kechi twasaka kuchina lufu ne.

“Byo nkakwatwa na moyo, Nkemuketekela.”

—Masalamo 56:3


(Monai milaye ya Lesa pa peje 46)

## YESU WAKONSHA KWIMUPULUSHA KABIFI UBENA KWIMULOMBELELA

“Pakuba uno, byo aikala myaka . . . . Aye wakonsha kwibapulusha kya kine kine [kupwijijila] abo bafwénya kwipi kwi Lesa mwi aye, byo aikala myaka ne myaka mu kwibalombela [kwibasanshijilako].”

—Bahebelu 7:24, 25

# ANWEBA NE AMIWA TWAKONSHA KWIKALA NA BUMI BWA MYAKA



**Nanyi jishinda jo  
MUBENA kuyamo?**

Yesu Kilishitu ye  
JISHINDA jaya ku  
BUMI bwa myaka ne  
Lesa.

Diabola (Satana) ye  
jishinda jaya ku LUFU  
lwa myaka.

Uno kalumbwana wasala kyawama kyaku bumi bwa myaka.

## **ANWEBA MUSA KUSALAPO KYEPI? 17**

**“... Salululai lelo ye mukengijilanga....”**

—Yoshua 24:15

**“... Onkao mambo salululai mweo, namba anweba ne bana benu mukekalenga na bumi.”**

—Mpitulukilo Ya Mu Mizhilo 30:19

### **YESU YE JISHINDA JAYA KU BUMI BWA MYAKA**

**“Kabiji lupulukilo kechi luji mu mukwabo nangwa umo ne: pakuba kechi paji jizhina jikwabo muno munshi, japewá mu bantu, jo twafwainwa kupulukilamo ne.”**

—Byubilo Bya Batumwa 4:12

**“Amiwa yami Yehoba, ka kuji mupulushi mukwabo nangwa umo ne, kana amiwa yenka.”**

—Isaya 43:11

# 18 MAMBO KA TWAFWAINWA KUSAJILA YESU INGE TWASAKA BUMI BWA MYAKA?

## 1. *Ye Kilishitu waishile.*

“...Amiwa naishile namba bamone bumi...” —Yoano 10:10



## 2. *Ye Kilishitu witutemenwe ne kwitu-fwila.*

“...Mwana Lesa, ... wantemenwé ne kwipana wipaine mwine na mambo a amiwa.”  
—Ngalatiya 2:20

Yesu waalukile ke muntu, wa nyama ne mashi byonka byo tuji, “**amba monka mu lufu amuvulañanye ke watu awa wajinga na bulume bwa lufu, ko kuba'mba, Dia-**


**bola; ne kwibapokolola bonse bajinga mu buzha 19**  
**moba onse a bumi bwabo na mambo a kuchina**  
**lufu.”** —Bahebulu 2:14, 15

### ***3. Mashi a Yesu onka ye muchi wa mambo etu.***

**“...Mashi o emufuchila mambo [kulekela mambo] na**  
**mambo a bumi bujimo.”** —Bena Levi 17:11

**“...Mashi a Yesu Mwananji etutokesha ku bundenga-**  
**mambo bonse.”** —1 Yoano 1:7

**“Mwi aye mo mo twamwena bukuzhi [lupulukilo] bwetu,**  
**lo lulekelo lwa mambo etu. ”** —Kolose 1:14



#### **4. Ye Kilishitu wasangukile mu bafu.**

**“Kasa twayuka namba Kilishitu, byo asangulwa mu bafu, kechi ukafwa jibiji ne; lufu pano kechi lumube ke nkambo [kulama] yanji ne.”**  
—Loma 6:9

**“Kabiji wibafwijile bonse, amba, bekála na bumi kechi bakikale na kwiitokesha michima yabo abo bene ne, poso kutokesha muchima wa yewa wibafwijile ne kusanguka.”** —2 Kolinda 5:15

Yesu waambile'mba, . . . **“Byo naikala na bumi amiwa, ne anweba nenuwa mukekalanga nabo.”**  
—Yoano 14:19

**5. *Twafwainwa kwikala na Mupashi wa Kilishitu mwi atweba pa kusangwilwa ku bumi bwa myaka*** **21**  
(mu kwikala myaka).

**“... Kilishitu uji mwi anweba lo luketekelo Iwa luku-  
mo.”** —Kolose 1:27

**“Mambo umvwe Mupashi wa yewa wasangwilé Yesu mu bafu waikala mwi anweba, yenkawa wasangwilé Kilishitu Yesu mu bafu ye ukapana bumi ku mibiji yenu ya lufu [mibiji ibola] na Mupashi wanji waikalá mwi anweba.”** —Loma 8:11

## **YUKISHAI'MBA MUPASHI WA KILISHITU WAIKALA MWI ANWEBA**

**“...Kabiji umvwe muntu wabulwá Mupashi wa Kilishitu, kechi ye wa kwanji ne [kechi yewa kwa Kilishitu ne].”** —Loma 8:9

## 22 YESU WATEMWA BANA BONSE

**Ponkapo aye  
wibatambwile mu  
maboko anji, ne pa  
kwibabika makasa  
anji, wibapesheshe.**

—Mako 10:16



“Yesu wantemwa’miwa, Buku wanji wambula.”



**“Pakuba Yesu wibechile ko aji, amba, ‘Tulekai twana 23  
tucheche twiye kwi amiwa, ne kwitukanya ne: mambo  
bufumu bwa Lesa bo bwato tuji bibye.’ ”** —Luka 18:16

**“Mo mwaya ne muchima wa Shenu wa mwiulu, kechi  
usaka nangwa kamotu ka tutu tucheche konaike ne [kufwa  
nangwa kutaika myaka].”** —Mateo 18:14

Kechi na mambo a byomuji nangwa na mambo a komwikala ne, Yesu wimutemwa kabiji wimufwijile. Yesu wasaka butemwe *bwenu*, pamo. Mwakonsha kumwasha butemwe bwa Yesu ponka pa kumukokela Aye.

**“Inge mwantemwa, mukalama mikambizho yami.”**  
—Yoano 14:15

**“Nangwa mwanyike wimwasha byo aji monka mu byubilo  
byanji . . . .”** —Byambo Bya Mana 20:11

## BYO MWAKONSHA KUMONA JISHINDA JENU KWI LESA

1. *Swai'mba mwi bandengamambo (mwalengulula Lesa).*

“Mambo bonse balenga mambo, kabiji bapelelelatu ne kufika ku lukumo Iwa Lesa ne.” —Loma 3:23

2. *Iyai kwi Lesa kupichila mwi Yesu Kilishitu.*

“Mambo kuji Lesa umo yenka, ne ñambi nanji umo yenka, uji pakachi, aku Lesa aku bantu, aye mwine ye muntu, yenkaye Kilishitu Yesu.” —1 Timoti 2:5

“Onkao mambo aye [Yesu] wakonsha kwibapulusha ... abo bafwénya kwipi kwi Lesa mwi aye ....” —Bahebelu 7:25

Yesu waambile'mba, “...Awa wíya kwi amiwa kechi nkamupange [nkamutaye] nangwa pacheche ne.” —Yoano 6:37

### 3. *Lapilai ku mambo enu.*


(Kulapila ko kuba bulanda bwakuba'mba waleka kulenga mambo.)

**“Byonkabyo lapilai, ne kwaluluka, mambo enu azhi-mañane . . . .”**

—Byubilo Bya Batumwa 3:19

**“Aye Nkambo . . . wimute-kenya [kupembelela] muchima, byo abula kusaka nangwa umo onaike ne, poso amba, bonse balapile.”** —2 Petelo 3:9

**4. *Sololai mambo enu kwi Yesu.*** (Kusolola ko kubulañana nangwa kuswa.)



**“Umvwe twisolola mambo etu, aye ye wa kishinka ne kolo-ka mu kwitulekela mambo etu . . . .”**

—1 Yoano 1:9

**26** Mu mikuku iji panshi nembai bulongo veleshi wa 1 Yoano 1:9 wanembwa pa maboko abena kulomba pa peje 25.

---

---

---

---

**5. *Lekai bubu bwenu (mambo enu).***


(kuleka ko kusha nangwa kuvundamina).

**“Awa ufyá mizhilulwila yanji kechi ukamona byawamá ne; pakuba awa wiisolóla ne kwiileka kikupu ukamona lusa.”**

—Byambo Bya Mana 28:13

**“Fumako ku bubu, ne kuba byawamá.”**

—Masalamo 37:27



“Mambo ko ku bupe ko mwapu-  
lukila monka mu Iwitabilo; . . . ,  
kyo kya kupa-natu aye Lesa;  
kechi kya mu mingilo ne, kuchi-  
na'mba, muntu nangwa umo  
waketota. ” —Efisea 2:8, 9

## 6. *Itabilai Yesu Kilishitu.*

27

“ . . . Umvwe witabe pa  
kanwa kobe amba, Yesu  
ye Nkam-bo, ne kwitabila  
mu muchima wobe amba,  
Lesu wamusangwile mu  
bafu, ukapuluka.”

—Loma 10:9

“ . . . Itabilai Nkambo Yesu,  
musakupuluka anweba, ne  
ba mu nzubo yenu pamo.”

—Byubilo Bya Batumwa 16:31

**28** 7. *Tambulai Yesu Kilishitu mu muchima wenu ne mu bwikalo bwenu.*

Posotu mwashinkula muchima wenu ne kumwita Yesu amba



atwelemo. Yesu waambile'mba, **“Tala, naimana ku kibelo kasa nkokaula: umvwe muntu waumvwa jiji jami ne kunshinkwilako, amiwa nkatwela mo aji ne kuja nanji, ne aye ne amiwa.”**

—Lumwekesho 3:20

**“Pakuba bonse mo bavujila bamutambwilé, i bo bo apele lūsa lwa kwikala ke bana ba Lesa, ke bonkaba baitabilá mu jizhina janji.”**

—Yoano 1:12

Umwwe kechi mwalombapo kala ne kabiji mwasaka bukwasho pa kulomba, mwakonsha kulondela lulombelo lwanembwa munshi nobe kya kwimukwasha:



**Nkambo Yesu Wawama,**

**Nasanta pa kufwa pa musalabu mu kufumya mambo ami. Ndekelaiko mambo pa bibi byonse byo nauba. Nemulomba namba lyai mutwele mu muchima wami ne kwikala monka myaka yonse. Nemuketekela namba musa kutoksha muchima wami lonka luno. Nemutambula namba mwikale Mupulushi wami ne Nkambo yami ami mwine.**

**Mu Jizhina ja Yesu, Amena.**

## 30 NE YESU MU MUCHIMA WENU, MUJI NA BUMI BWA MYAKA

“...Lesá witupele bumi bwa myaka, ne buno bumi buji monka mwi Mwananji. Awa uji na yewa Mwana ye uji na bumi....” —I Yoano 5:11, 12

“...Aye waumvwa mambo ami, ne kumwitabila aye wantumá.... mu lufu wafumamo, wapitaila ku bumi.” —Yoano 5:24

Umvwe mubiji wenu wafwa, abya muji kwenu ne Nkambo (2 Kolinda 5:8) “...**Kilishitu uji mwi anweba lo luketekelo Iwa lu-kumo**” (Kolose 1:27).

Inge mwalomba kwi Yesu'mba emulekeleko mambo enu ne kwitabila Nkambo Yesu Kilishitu amba ekale ke Mupulushi wenu, nembai jizhina jenu munshi:

---





Tangai maveleshi kufuma mu Buku wa Lesa (Byo Byambo bya Lesa) moba onse ne kwiafya mu muchima wenu pa kulabijila maveleshi anema a kwimukwasha. (Avula aji mu kano kabuku.)

**“Binembelo byonse byanembeshi-wa kwi Lesa, kabiji byo bya-wamina mu kwibafunjisha bantu [byo mwaitaba], ne mu kwibalengulula ne mu kwibolola, ne mu kwibafunda mu bololoke.”**

—2 Timoti 3:16

## 32 ISAMBAI NE YESU MU MILOMBELO KIMYE KYONSE



*Musanchilai Yesu* pa bintu byawama byonse mu bwikalo. *Mutotai* pa bintu byoemubila ne pa kupulusha mweo wenu. ***Lombai pa kukajilwa ko muji nako.*** Lombai mu Jizhina ja Yesu.

“...Umwwe twalomba kintu, nangwa ki ka, mwayilá muchima wanji, aye witumvwa.”  
—1 Yoano 5:14

“...Umwwe mwalomba kintu kwi Batata, aye ukemupakyo mu jizhina jami.”  
—Yoano 16:23

“...Isolwelai mambo enu anwe bene na bene ne kwilombela....” —Yakoba 5:16

“...Sa mwibatemwa balwanyi benu ne kwibalombela bemupatá.” —Mateo 5:44

# ULOMBELO LWAFUNJISHE YESU KU BANA 33 BANJI BA BWANGA

(Mwana wa bwanga ke muntu ulondela Yesu.)

Yesu wafunjishe bana banji ba bwanga kulomba mu jino jishinda:

**“Tata wetu wa mwiulu, Jizhina jenu jizhile [jilenga moyo].  
Bufumu bwenu bufike. Kyaswa muchima wenu kyubiwe  
pano panshi, byonka byo kyubiwa mwiulu. Mwitupeko  
kajo ketu ka lelo. Ne kwitulekelako mambo etu, byonka  
byo twibalekela betulénga mambo. Kabiji kechi mwitutu-  
wale mu lweseke ne, mwitupokolole kwi yewa mubi.”**

—Mateo 6:9-13

Luno lulombelo lwafwainwa kulabijila. Baitabila javula balo-  
mbela pamo luno lulombelo saka basansula mawi.

# 34 MIKAMBIZHO JIKUMI YA LESA ITUFUNJISHA BYA KWIKALA

(Kulupuka kibaba 20)

*Itanshi Ina Iji pa Butemwe Bwetu bwa Kutemwa Lesa*

1. “Kechi mukekale na balesa bakwabo, ba kubikapo pe amiwa, ne.”

2. “Kechi mukesongele nkishi, nangwa kipashañano kya byepi kya kintu...kechi mukebilambile panshi nangwa kwibingijila ne....”

3. “Kechi mukejitele jizhina ja Yehoba Lesa wenu patutu ne....”

4. “Kasa muvuluka juba ja sabado mu kwijizhijika.”

*Yapelako Itanu na umo Iji pa Butemwe bwetu bwa Kutemwa Muntu*

5. “Kasa munemeka bashenu ne bainenu . . . .”
6. “Kwipayañana ne.”
7. “Kuba bukende ne” (Bukende ko kubula bukishinka kwa mulume nangwa mukazhi.)
8. “Kwiba ne.”
9. “Kumubepela mukwenu ne.”
10. “Kukumbwa . . . nangwa kintu kya byepi kya mukwenu ne.”

**LUKOKELO KWI LESA LULETA MIKUMBU KU  
MILOMBELO YETU**

“Kabiji byonse byo tulomba tutambula kwi aye, mambo tulama mikambizho yanji ne kuba byonka byawamá ku meso anji.”

—1 Yoano 3:22

**MIKAMBIZHO IKATAMPE IBIJI*****Butemwe bwa kutemwa Lesa***

1. “Kumvwa aye amba, ‘Ukamutemwa Nkambo Lesa wobe na muchima wobe yense, ne na mweo wobe yense, ne na mana obe onse.’ Awo ye mukatampe, ye mukambizho mutanshi.”

—Mateo 22:37, 38

***Butemwe bwa kutemwa Muntu***

2. “Kabiji wa bubiji waesakana nanji ye ye uno amba, ‘Ukatemwa mukwenu pamo byonka byo witemwa obe mwine.’ ”

—Mateo 22:39

Yonse Mikambizho jikumi (mapeje 34 ne 35) yapwila mu Mikambizho Ikatampe Ibiyi.



# **BUTEMWE BO BWAKIJISHA PA BYONSE 37**

**“Kibaba kya Butemwe” Kikatampe**

**(1 Kolinda 13:1-8, 13)**

**<sup>1</sup> Nangwa ñamba na njimi ya bantu ne ya bamalaika, umvwe ne kwikala ne butemwe ne, naaluka ke nobe lubemba uvúma, nangwa lusonsolo ubátu nge nge nge. <sup>2</sup>Kabiji nangwa nji na bungauzhi, ne kuyuka byafyamiká byonse ne mana onse; kabiji nangwa nji na lwitabilo lonse, lwa kutuntulula mitumba, umvwe ne kwikala ne butemwe ne, ne watu. <sup>3</sup>Kabiji nangwa mpana [kulambula] bintu byami byonse mu kwibajisha balanda, nangwa kupana mubiji wami namba asokwe, umvwe ne kwikala ne butemwe ne, kechi mmwenemo kintu ne. <sup>4</sup>Butemwe butekanyatu [buchinchika] kasa buba lusa; butemwe kechi buba kichima ne; nangwa kwitota ne; kechi bwilundumi-**

**38** ka ne nangwa kuba bya bumvu ne. Kechi bwikebela bintu ne; kechi buzhingila ne, nangwa kutako muchima pa kubiwa byatamá ne; <sup>6</sup>kechi busekela mu bya-bulá koloka [bya bipa] ne, kana na bya bukine. <sup>7</sup>Butemwe busenda byonse sa buzhindama, kabiji bwitaba byonse, kabiji buketekela byonse, kabiji butekanya mu byonse. <sup>8</sup>Butemwe kechi bupwa ne: pakuba bya bungauzhi bikapita; ne njimi nayo ikapwa; ne mana nao akapita.

<sup>13</sup>Pakuba pano bino bisatu, ne lwitabilo, ne luketekelo, ne butemwe, byaikala; kabiji kikatampe kya mu bino bisatu bo butemwe.

## **LESA YE BUTEMWE**

“... Lesa ye butemwe; ne aye waikalá mu butemwe, ye waikala mwi Lesa, ne Lesa waikala mwi aye.”

—1 Yoano 4:16



# YESU WASAKA OBEWA KUSHIMUNA KU BAKWENU

39



(ku nzubo, ku sukulu, ku  
kipwilo ne konsetu)

Yesu waambile'mba,  
“Yainga kwenu ku ba-  
longo benu, mukebabule  
abya bikatampe byo emu-  
bila Nkambo, ne byo emu-  
bila lusa.”

—Mako 5:19

## **40 BYA KUYUKA MWANA LESA WA KINE**

**“Byonkabyo mukebayukila ku bipangwa byabo.” —Mateo 7:20**

**“Pakuba bipangwa bya Mupashi bo butemwe, ne lusekelo, ne mutende, ne kukoka muchima [kutekanya], ne lusa, ne buwame, ne bukishinka, ne bukimote, ne kwikanya . . . .”**

**—Ngalatiya 5:22, 23**

### **MWANA LESA WA KINE ULEKELA BAKWABO MAMBO**

**“Mambo umvwe mwibalekelako bantu mambo abo [bibi byabo], ne Shenu wa mwiulu naye ukemulekelako ne mambo enu pamo.”**

**—Mateo 6:14**

### **BINTU BITANU NA BIBIJI BYO ASHIKWA YEHOBA**


**“O meso a kwitota, ne lujimi wa bubela, ne maboko echíla mashi a babulá mambo, ne muchima ulangulukíla jimo mwakubila bubi, ne maułu anyéma lubilo mu kuya na kuba byatamá, ne kamonyi wa bujimbijimbi wámba bya bubela, ne aye ubúsha mapata mukachi ka balongo na balongo.”**

**—Byambo Bya Mana 6:17-19**

“... Bulalelale, [kwilala kwa babula mu masongola],... ne kupopwela bankishi, ne bya buñanga bwa lubuko, ne mafika, ne lutobo, ne bichima, ne bukaji, ... ne kupendwa, ... ne bya byonkabyo; ... abo bóba bya byonkabyo kechi bakaswana bufumu bwa kwa Lesa ne.”

—Ngalatiya 5:19-21

“... Nangwa besámba ne banabalume bakwabo, nangwa bangivi, nangwa ba lunkumbwa ....” —1 Kolinda 6:9-10



**LEKAI YESU EMUYUZHE NA MUPASHI WANJI NE KWIMUTOKESHA**

“Kabiji anweba bamo mwajinga ba byonkabi: bino pano bemovwa, bino bemuzhijika [kupatiulwa],...monka mu jizhina ja Nkambo Yesu Kilishitu, ne mu Mupashi wa Lesa wetu.”

—1 Kolinda 6:11


# 42 KISHA (KIZHIBA) KYA MUJILO KE MPUNZHA YA KINE

(Tangai Luka 16:19-26.)

Monai'mba mwaketekela mwi Yesu Kilishitu. Aye ukabika jizhina jenu mu Buku wa Bumi.

**“Kabiji bonse babujilwé kunembwa mu buku wa bumi, baelelwe mu kizhiba kya mujilo.”**

—Lumwekesho 20:15



# YESU YE YENKA JISHINDA JAKUYA KWI LESA


43

“... Lesa witupele bumi bwa myaka, ne buno bumi buji monka mwi Mwananji.” — 1 Yoano 5:11

“Mambo mfweto ya bundengamambo lo lufu; pakuba kya bupe kyo apanatu Lesa bo bumi bwa myaka mwi Yesu Kilishitu, Nkambo yetu.” —Loma 6:23

“Aye wamwitabilá Mwana ye uji na bumi bwa myaka; pakuba aye ubúla kukokela Mwana kechi akamone bumi ne, ne bukaji bwa Lesa bwaikala pe aye.” —Yoano 3:36

“Kumvwa Yesu wamwambile'mba, 'Amiwa ne jishinda, ne bukine, ne bumi: ka paji wíya kwi Batata ne, poso pe amiwa.' ” —Yoano 14:6



Mu kimwesho kya Yoano mu Lumwekesho 21 wamwene jiulu jipya ne ntanda ipya.

**“Kabiji aye ukashimuna mipolo yonse ku meso abo; ne lufu kechi lukekalako jibiji ne; nangwa mabingo, nangwa kujila, nangwa misongo, kechi bikekalako jibiji ne: bintu bitanshi byapichijila.”** Ne aye waikalá pa jitanda waambile’mba, **“Tala, naalula bintu byonse ke bipya . . . .”**

—Lumwekesho 21:4, 5

Yoano wamwene muzhi wazhila, Yelusalema mupya, kasa ekila mwiulu kufuma kwi Lesa . **“ . . . Ne muzhi waji wa ngolode yawamishá nobe ngalashi ya kilola. Bitendekesho bya nkambi ya muzhi byanengezhiwe bulongo na misango yonse ya mabwe a buneme . . . .”**

—Lumwekesho 21:18, 19

## **YESU WAYA NA KUNENGEZHA MUZHI WA 45 BONSE BAITABILA MWI AYE**

**“Michima yenu kange ilukute ne: itabilai Lesa, mwitabile ne amiwa. Mu nzubo ya Batata muji mwakwikala mwavula; inge ka mwaji byobyo ne, inge nemubula; pakuba mbenakuya mu kwimumwena kuntu. Kabiji inge naya na kwimumwena kuntu, nkeya jibiji, ne kwimutambula kwami ami mwine; namba akwa ko nji amiwa, ne anweba mukekale konka.”**

**—Yoano 14:1-3**

### **BULAI BAKWENU ANO MAMBO AWAMA**

**Yesu waambile'mba, “...Yainga panopantanda ponse, mukasapwile mambo awamá ku bilengwa byonse.” —Mako 16:15**

**“...Awa upulúsha myeo ya bantu ye wa mana.”**

**—Byambo Bya Mana 11:30**

# 46 MILAYE YA LESA KU BANA BANJI

“... Kechi nkakushe nangwa kachechetu ne, ne kukulekelela nangwa kachechetu ne.” —Bahebelu 13:5

“Mambo aye ukakulayila bamalaika banji, amba Bakakulame mu mashinda obe onse.”

—Masalamo 91:11

“... Ka paji ukonsha kwiisompola mu kuboko kwa Batata ne.” —Yoano 10:29

“... Amiwa nji nenu moba onse, ne kufika ku juba jikapeláko.” —Mateo 28:20

“Kechi wakamwe byo waya umaname ne.... Kasa ukosa mu lwitabilo kufika ne ku lufu ne amiwa nkakupa munchinya wa bumi.” —Lumwekesho 2:10

“Ngité amiwa ne amiwa nsakukwitaba ....” —Yelemiya 33:3






*Bonsetu bakasangulwa kufuma ku bafwa*

“...Juba jibenakwiya, jo bakomvwa bonse bají mu bilende jivi janji, kepo bakafumamo; baubilénga byawamá, ku lusanguko lwa bumi; aba baubilénga byatamá, ku lusanguko lwa kije [kuluzhachisho].” —Yoano 5:28, 29

*Bafu bamwi Kilishitu bakasanguka patanshi.*



“Ponkapo ne atweba tukatánwa bomi, tukashikulwa nabo pamo mu makumbi, mu kusambakana nanji Nkambo mwiulu: byonkabyo tukekala ne Nkambo myaka ne myaka.”

—1 Tesalonika 4:17

“Sa...mutoñama ne kulomba: pakuba anweba kechi mwayuka aja juba po jikeshila ne.”

—Mako 13:33

**YESU UKEYA BYEPI?**

**“Talai, aye wiya na makumbi; ne meso onse akamumona....”** —Lumwekesho 1:7

Jimukai naba Kilishitu babubela ne bangauzhi ba bubela.

**“...Umwwe muntu akemwambile’mba, ‘Talai! Kilishitu uji kuno,’ nangwa’mba, ‘Kuno;’ kechi muketabe ne.... kana bakemwambila’mba, ‘Talai, uji mungye;’ kechi mukayeko ne: nangwa kwamba’mba, ‘Talai, uji mu mazubo a mukachi;’ kechi muketabe ne.”** —Mateo 24:23, 26

**YESU UKEYA BUKIJI MU MAKUMBI A MWIULU**

**“Mambo byonka byuba kubesha kwa mvula kufuma ku musela ne kumweka ku muzhika; byo kikekala ne pa kwiya Mwana muntu....mikoka yonse ya pano panshi...bakamumona ne Mwana muntu sa eya mu makumbi a mwiulu na bulume ne luku-mo lukatampe.”** —Mateo 24:27, 30

# SALAMO WA KAFUNGA

(Masalamo 23)

**<sup>1</sup>Yehoba ye kafunga wami; kechi nkakajilwa ne. <sup>2</sup>Mo mu nsono ya munyemvu mo andajisha; Mo mu misezho ya mema azhindamá mo antangijila. <sup>3</sup>Aye ungikizha muchima wami; Aye umbula mu mashinda a bololoke na mambo a jizhina janji. <sup>4</sup>Ee kine, nangwa naenda, mu mangawa a kimvule kya lufu, Kechi nkachina kibi nangwa kya byepi ne; mambo anweba muji ne amiwa; Mfimbo yenu ne mukombo wenu binzhindamika muchima. <sup>5</sup>Anweba mungajila tebulu mu kyenyi kyami ku meso a balwanyi bami; Mwanshinga manyi ku mutwe wami; Kitomeno kyami kyayula, ke kiichike. <sup>6</sup>Kine buwame ne lusa bikandondelanga moba onse a bumi bwami: Ne amiwa nkekalanga monka mu nzubo ya Yehoba myaka ne myaka.**

Scripture text from Bible by United Bible Societies. Used by permission.

---

If you are interested in receiving additional Scripture booklets, write to the publisher in English.

**World Missionary Press, Inc.**  
**P.O. Box 120**  
**New Paris, Indiana 46553-0120 U.S.A.**

**Bupetu—kechi kupotesha ne**

[www.wmpress.org](http://www.wmpress.org)

11-16

2245 Kaonde WTG

